

民数四千而已：一（百）〔千〕八百年有六万八百二十二入；一千八百五十一年乃有二十三万二千八百四十一人；一千八百六十一年至二十九万六千零七十六人；一千八百七十一年至三十四万三千七百八十七人。例举议院绅三人。每年制造器物值五百万磅；每礼拜耗金料一千两，耗金叶七十两。业制造者二万馀家，每日用煤六百吨。礼拜堂一百七十区。曾晤其教（师）〔士〕堆尔，闻最善言辞。大藏书楼一区，小藏书楼四区，兽学园、画会院各一。议事厅一，梅尔及阿（力）〔得〕门会议于此，可坐六千人。其地创造机器者曰华脱，闻其厂犹存。又博里斯特力始推知养气，达韦始考求动物之学，波势令始考求植物之学，并为白名登人，言实学者创始之一端也。属部尚书嘎尔讷尔芬告退，以议阿非利加属部番民滋事，因及俄、土之战，英国不宜与闻，且谓一千八百五十六年英、俄两国交战，流极使然，恐此次又或流荡而不可止也。诸执政责其不宜为此言。哈尔讷尔芬因求退，毕根士由留之。顷因土事日棘，毕根士由饬地中海水师进入马摩拿海，户部尚书罗斯噶得又饬议院筹画军饷。哈尔讷尔芬谓战事已成，非渠意，因力求退。英国执政十二人，军国大事必会商，持议不合，则视其权力所趋而相从附和者之众寡以为进退，无中立相持者，亦无顾恋禄位逶迤以求容者，此风俗之所以厚也。

廿五日。礼拜。接上海十一月初九日所发第五十四号包封，内李筱荃、唐景星、彭仲莲、黄泳清各信，并家信第十四号十月廿三日发，意城及志城信第十三号十月廿日发，又子瀚及江芾生二信。子瀚信语及曹柳桥《三世见闻录》，以其家继事过诋卫靖澜、唐艺农，致入弹章。官司临门逼迫，系縲其孙，以速其死。亦不善处衰叔之世者也。卫靖澜有能名，尤善趋时，以自附于清议，一时翕然称之。要皆未有闻于君子之道也。国家风气所趋，别有一种

不明事理之能干，不辨皂白之公论，不可究诘之正派，不能体察之清廉。其为物望所归者，大都此种人才而已。如卫君者，盖亦所谓应运而生者也。

廿六日。新报载：喀什噶尔已为官军收复，古里碑以所部二千人逃往俄国，现立摩萨阿拉密汗为喀什噶尔王。喀什噶尔隶西域版图，谓之新疆，向未立王。俄古柏据有新疆十馀年，经左军收复，万无别立王之理。摩萨阿拉密又始终未一见其人，不知俄国新报何所据而为此言？前后哈吉目堪、古里碑两酋并逃归俄人，俄人一皆收抚之，其用心尤有不可测者。新疆收复可喜，而伊犁一城尚为俄酋所踞，未知何以为善后之计，念之尤可忧也。

廿七日。接黎莼斋、刘和伯、张听帆公信，中叙德国开色国王之称、开色邻国后之称请听音乐及屋柏拉园跳舞会，其礼文与英国又异。李湘甫邀同李丹崖、罗稷臣及彦嘉、在（德）〔初〕、夔九、玉屏、马格里、屠迈伦晚酌。外部刊报日常有之。德在初译其为何事而已，其详不及知也。本日适马格里就谈，出所得刊报七本示之，始稍知其事实。其间与比利时议定交还罪犯增加五条，准情酌理，两国均宜之。其与达和米国在阿非利加之西定立章程六条，则一船主色里珥斯与达和米国王议定者也。大率保护英商、禁止其国贩卖黑奴出口各事。又与埃及国定立禁止贩卖黑奴章程七条，准英国兵船在埃及各海口巡查，其船人交埃及处办，而所贩黑奴听从英国位置。又处置旧有黑奴章程，则责成埃及自行清理，所有黑奴及其子孙一以平民视之，听从自营生理，并送其所生之子女入学读书。西洋大国以爱民之心，推类以及异国无告之民，设法以维持之，其仁厚诚不易几也。其勃然以兴，又何疑哉！询知埃及黑奴掠买自阿北西尼亚，达和米则黑奴所从出也。其国王岁杀人祀神，必强各国商民往观其地出油，遍行西洋各国，船主不能禁止